

Abogadonan di Gobierno den Corte

ASOMA kier purba pasa tras lomba di SAC pa organiza nan evento

ORANJESTAD(AAN) — Ayeramainta Corte den Promer Instancia a trata e caso LAR cu ASOMA a cuminsa contra Promer Minister. ASOMA a worde representa pa miembronan di e directiva diario esta sr. Rasmijn, sr. Juddan y sr. Marten mientras cu gobierno a worde representa pa abogadonan

mr. Ecury, mr. Gravenstijn y mr. Faouzi. Door cu ta reina hopi interes den e caso aki, DIARIO a dicidi di publica e punto di bista di cada partido separa pa asina nos lectornan por saca nan conclusion. Den e articulo aki, DIARIO ta publica punto di bista di abogadonan di gobierno.

ASOMA SU DIRECTIVA

NO TA LEGAL

Abogado mr. Faouzi a cuminsa na bisa Juez mr. Angela cu mester declara e demanda di ASOMA no admisible pasobra e directiva diario di ASOMA no ta autoriza. E abogado a cuestiona e hecho cu e directiva di ASOMA no ta legal ya cu pa basta tempo no a tene un elec-

cion y a haci cambianan den e directiva sin a tene un eleccion. El a menciona tambe articulo di statuut di ASOMA cu ta muestra cu ta un cantidad di miembro di e directiva mester firma e peticion pa e caso, cual no a sosode.

NO POR TENE CASOCA

E abogado ta haya cu no por honra e peticion di ASOMA

pa tene CASOCA dia 15 di Februari ya cu e dia ey lo tin un otro evento di carnaval y polis lo tin tur su hendenan eynan. Ademas e abogado ta haya cu lo bay ta hopi dificil pa ASOMA organiza e evento aki ainda riba 15 di Februari.

Mr. Faouzi a bisa Juez cu no tin motibo di urgencia pa cu e caso aki. ASOMA a laga basta tempo pasa promer cu a cuminsa e caso.

E abogado a splica cu ASOMA a haci su peticion pa e permiso demasiado laat. Normalmente ta asina cu for di November 2002 mester haci e peticionnan pa asina SAC, cu ta e organo cu ta coordina e eventonan di carnaval, por tene debito cuenta cu esaki.

PASA TRAS DI LOMBA DI SAC

E abogado ta haya cu ASOMA kier haya sentencia den e caso aki pa asina nan por pasa tras di lomba di SAC pa organiza CASOCA. E abogado ta haya e argumentonan di Alto Comisario Nectar na su lugar ya cu ta SAC ta encarga cu eventonan di carnaval. E abogado a bisa cu no ta asina cu door cu gobierno a fiha un maneho, esaki mester ta un ley. Gobierno pa añas a hiba e maneho cu SAC ta encarga cu coordinacion di eventonan carnavalesco. Tur organizacion cu kier organiza un evento, mester notifica SAC promer. SAC no tin monopolio. SAC ta un organizacion nonprofit cu ta organiza eventonan pa asina genera placa pa cubri gastonan di otro eventonan di carnaval entre otro paga e musiconan miembro di ASOMA. Den e caso di CASOCA, SAC no por permiti cu ASOMA ta bay organiza un evento sin cu SAC ta haya entrada di esaki. E entrada aki tambe ta yuda cubri e gastonan cu SAC tin.

Juez despues di a scucha e punto di bista di parti di e abogadonan di gobierno a propone pa e partidonan sinta na mesa y yega na un arreglo. E ta haya cu ta di lamenta cu hustamente den carnaval tin problema asina. El a instrui e abogadonan pa informe pa diaranzon si SAC ta dispuesto pa sinta na mesa cu ASOMA.